

# Ein Rädel von Wirtten

Oswald von Wolkenstein (vor 1408)



- - HEr wiert, uns dürs-tet al - so se - re, trag auf wein, trag auf wein, trag auf  
wein! Das dir got dein laid ver - ke - re, pring her wein, pring her wein, pring her wein!  
Vnd dir dein säl - den me - re, nu schenck ein, nu schenck ein, nu schenck eyne! -

1. HEr wiert uns dürestet also sere /  
trag auf wein / trag auf wein / trag auf wein /  
Das dir got dein laid verkere /  
pring her wein / pring her wein / pring her wein /  
Vnd dir dein sälden mere /  
nu schenck ein / nu schenck ein / Nu schenck eyne /
2. GRetel wiltu sein mein treutel /  
so sprich sprichs / so sprichs / so sprich sprichs /  
Ja koufst du mir einen beutel /  
leicht tün ichs / leicht tün ichs / leicht tün ichs /  
Vnd reyss mir nit das heutel /  
newr stich stichs / newr stich stichs / newr stich stichs /
3. Sym jensel wiltus mit mir tanczen /  
so kom auch / so kom auch / so kom auch /  
Böckisch well wir umbhin ranczen /  
Jans nit strauch / Jans nit strauch / Jans nit strauch /  
Vnd schon mir meiner schranczen /  
dauch schon dauch / dauch nach dauch / dauch Jensel dauch /
4. Pfeiff auff hainczel lippel snäggel /  
frisch frow fry / frisch frow fry / frisch frow fry /  
Zwayt ew rürt ew snurra bäggel /  
jans luczei / Cüncz kathrey / Bencz Clarey /  
spring kelbrisch durta jäckel /  
iu hayg hayg / ju hayg hayg / ju hayg hayg /
5. HJn get der raye seusa möstel /  
nu reckt an / nu reckt an / nu reckt an /  
gumpp auf hainreich noch ein jösstel /  
rür biderbman / rür biderbman / rür biderbman /  
mecz diemut döwt das kösstel /  
dran dran dran / dran dran dran / dran dran dran /
6. NV füdert ew man ysst jm dorffe /  
nempt kain weyl / nempt kain weyl / nempt kain weyl /  
nachin Cünrat fauler thschorffe /  
du lempeyl / du lempeyl / du lempeyl /  
lüg umb dich als ein orffe /  
eyl held eyl / eyl held eyl / eyl eyl eyl /